



Hans Enoksen, Naleraq

/Maani

**Nuuk lmeq matunerata kingorna sodavandit akii pillugit § 37 naapertorlugu apeqqummut 2024-145-mut akissut**

Brevdato: 28-06-2024  
Sagsnr. 2024 - 12993

Manna § 37 naapertorlugu apeqqutinut ataatsimut akissut nassiunneqarpoq.

P. O. Box 1037  
3900 Nuuk

Tel. (+299) 34 50 00

Fax (+299) 34 63 50

E-mail: oed@nanoq.gl

www.naalakkersuisut.gl

- 1. Nuuk lmeq matuniariartoq ingerlaannartumik sodavand-it akitsorneqarnerannut suna pissutaava?**
- 2. Naalakkersuisut 2023 ukiakkut akitsuisoqassanngitsoq oqariartuutigereerlugu sooruna eqqunngitsumik paasissutissanik Naalakkersuisut inatsisartunut saqqummiussaqaartut?**

Ataatsimut akissut:

Naalakkersuisut sodavandit akii pillugit Inatsisartunut eqqunngitsumik paasissutissiingillat.

Naalakkersuisut sodavandit akiinik qaffaangillat. Tamatuma saniatigut puunut nioqqutissanik eqqussuinermi akitsuut (puunut akitsuut) 1. januar 2024-mit appartinneqarpoq, kiisalu sodavandinik eqqussuinermi akitsuut il.il. juni 2024-mi appartinneqarpoq.

Naalakkersuisut 19. februar 2024-mi utertitsisarnerup aaqqissuuteqqinnerata kingunerisaattut sodavandit immiaaqqallu akii pillugit tusagassiortunut oqaaseqaataa innersuussutigineqarpoq<sup>1</sup>. Ilanngussaq takuuk.


Inussiarnersumik inuulluaqqusillunga

Erik Jensen

<sup>1</sup> Qallunaatut [Kommentar om priserne på sodavand og øl som følge af reformeringen af returpantssystemet \(naalakkersuisut.gl\)](#)  
Kalaallisut [Puukunik utertisarnerup iluarsiiqqineqarnerata kingunerisaanik sodavandit immiaaqqallu akii pillugit oqaaseqaat \(naalakkersuisut.gl\)](#)

# **Puukunik utertsisarnerup iluarsiiqqineqarnerata kingunerisaanik sodavandit immiaaqqallu akii pillugit oqaaseqaat**

Nassiussisuuvoq: Nunalerinermut, Imminut Pilersornermut, Nukissiutinut Avatangiisinullu Naalackersuisoqarfik



***Naalackersuisuniit oqaaseqaammi matumani sodavandit immiaaqqallu akiisa qaffannerisa kingunerisaanik inuiaqatigiinni tusagassiorfinnilu oqallinneq maanna ingerlasoq tunngavigineqarpoq. Naalackersuisut naliliinerat malillugu sodavandit immiaaqqallu akiinut maanna atuuttunut akitsuutit qaffasissusiinut tunuliaqutaasutut kisimik nassuiaatigineqarsinnaanngillat. Oqaaseqaat Nunalerinermut, Imminut Pilersornermut, Nukissiutinut Avatangiisinullu Naalackersuisup Kalistat Lundip oqaaseqaataanik imaqarpoq.***

**Naalackersuisut immiaaqqat sodavandillu akikinnerulernissaannik neriorsuisimannngillat**  
Naalackersuisuniit nassuerutigineqassaaq, UKA2022-mi aalajangiiffigisassatut siunnersuut aqutugalugu poortuutinut nalunaarutip allanngortinneqarnissaa – taamaalillunilu sodavandit immiaaqqallu akikinnerulernissaat – kissaatigineqarsimammat. Naalackersuisuniit suliap ingerlanerani siusissukkut poortuutinut nalunaarutip allanngortinneqarnerani inuussutissarsiutinik ingerlataqartunit akit qaffassanngitsut naatsorsuutigineqartoq paasineqarpoq. Naalackersuisut ilaatigut Brugsenip suliffeqarfimmiit akit appasinnerulernissaat suliffeqarfimmiit naatsorsuutigineqartoq pillugu oqaaseqaatai tunngavigalugit taamatut ilimasuttoqartoq paasivaat . Taamatuttaaq Naalackersuisuniit Nuuk lmeq A/S-ip suliffeqarfimmik matusiniarluni aalajangiinerat tunngavigalugu naliliipput.

Suliffeqarfik nammineerluni ukiut nikinnerisa kingorna unammillersinnaajunnaarnissaminnik naliliinini tunngavigalugu taamatut aalajangiivoq, sodavandinut immiaaqqanullu akit appasinnerulernissaat naatsorsuutigigamikku. Kiisalu Copenhagen Economics misissueqqissaarpoq, tassanilu pingaarnertut inerniliissutigineqarpoq, inuiaqatigiit kalaallit puukunik utertitseriaasiusimasoq atorlugu unammilleqatigiinnermi pissarsiassanik arlalinnik pinngitsuuisimasoq. Tamatuma saniatigut misissueqqissaarnermi inerniliisoqarpoq, pisariillisaaneq atuisunut arlalinnik iluaqutissartaqassasoq ilimanaateqarsinnaasoq, tassungalu sodavandit immiaaqqallu akikinnerulernissaat ilaatinneqarpoq.

Akit appasinnerulernissaat ilimanaateqaraluartoq, tassungalu ilanngullugu akit appasinnerulernissaannik niuertarfiit namminneerlutik naatsorsuutigisaqaraluartut, Naalackersuisuniit kalaallinut atuisunut immiaaqqat sodavandillu akikinnerulernissaat neriorsuutigineqarsimanngisaannarpoq. Taamaattumik Nuuk Imeq A/S-ip naalackersuinikkut neriorsuutininik eqquutsitsinngitsoortoqarnera, aammalu kusanaatsuliortoqarnera pillugu Atuagagdliutit-nut (AG) oqaasia ilumuunngilluinnarpoq. Tassunga assersuutitut inerniliinerup aamma aviisip saqqaani pisariillisaanerup kukkusumik ingerlanneqarsimanerarneqarnera naapertuutingilaaq eqqortuunanilu.

”Naalackersuisuniit ulluinnarni pisiassat akiinik aqutsisinnaangilagut, aqutsisnaangilagut aammalu taamatut kissaateqanngilluinnarpugut. Taamanikkut immiaaqqanik sodavandinillu tikisitsisarnissaq ammaanneqarmat Naalackersuisuniit akit ilisimaneqanngillat – taamaattumillu soorunami aamma akit qaffasissusissaat qulakkeerlugit oqaaseqarfigisinnaangilagut. Kisiannili nalunngilarput, Nuuk Imeq annerusumik unammillerneqalernissani peqqutigalugu matuniarluni aalajangertoq, aammalu niuertarfinniit sullissisut 2022-mi novembarimi akit appasinnerulernissaannik naatsorsuutigisaqarlutik oqaaseqartut. Ilaatigut tamakku peqqutigalugit 2023-mi ukiakkut KNR-imut oqarpunga, “naagga, akisunerulernissaat naatsorsuutigingilara, aammali akikinnerulersitsinissaq siunertaangilaaq”, Nunalerinermut, Imminut Pilersornermut, Nukissiutinut Avatangiisinullu Naalackersuisoq Kalistat Lund oqarpoq

### **Maanna akinut atuuttunut nassuiaatitut akitsuutit tunngavigineqarsinnaangillat**

Naalackersuisuniit naatsorsuutitsivugut (tak. matuma kinguliani allassimasut), taakkunanilu sodavandimut Faxe Kondi-mut, 1,5 literimik imalimmut akitsuutit qaffasissusii takutinneqarput. Tabelimi kisitsisini takutinneqarpoq:

- sodavandi Faxe Kondi pisiniarfinni 50 koruuninik + puaa tunineqarnermini akia

- sodavandimut Faxe Kondi-mut taamaattumut akitsuutit allaffissornermullu akiliutit 14,75 koruuniupput
- pisiniarfiit pisinermut, nassiussinermut, passussinermut aningaasartuutitut pissarsiassanullu 35 koruuninik akiliisarput

Akitsuutit qaffasissusii – pingaartumillu puukunut akitsuutit – niuertarfinniit pisiniarfinni akit qaffasinneri pillugit apeqqutilliisoqaraangat arlaleriarluni akissutitut saqqummiunneqartarput. Kisiannili Naalackersuisut inerniliinerat malillugu sodavandinut akinut maanna atuuttunut akitsuutit tunngavigineqarnerat nassuiaatigineqarsinnaangitsoq. Inerniliineq akiviusut akitsuutit qaffasissusiinik illuatungilerlugit naatsorsukkanik tunngaveqartutut oqaatigineqassaaq.

”Aammaarlunga erseqqissaatigissavara, Naalackersuisuniit ulluinnarni pisiassat akiinik aqutsinissaq aalajangersaanissarlu kissaatigineqanngimmat. Niuertarfiit kisimik tunisassamik qanoq akeqarnissaannik aalajangiisussaapput. Taamatut atugassaqartitsineq ataqqineqassaaq, inuussutissarsiortut niuernermi atugassarititaasut tunngavigalugit sulisussaammata”, Naalackersuisoq Kalistat Lund naggasiivoq.

Niuertarfinniit ukiut kingulliit ingerlanerini poortuutitut akitsuutit peerneqarnissaannik uteriillutik kissaateqartarsimmata, poortuutitut akitsuutit atorlugit avatangiisinut peqqissutsimullu siunertanut tapertaasarnerat puigorneqarpoq. Imeruersaatit tikisinneqartartut amerliartortillugit eqqakkat peqqissutsimullu sunniutit pillugit unammillernerit annertusiartortussaapput. Naalackersuisut isumaqarluinnarput – soorlumi niuertarfiit namminneerlutik taamaappasittut – innuttaasut aningaasaqarnikkut atugaat pitsaangortinneqartariaqartut. Taamaattumik Naalackersuisuniit oqaatigineqartarpoq, maannalu erseqqissaatigineqaaqqissalluni, poortuutitut akitsuutit naggataagut innuttaasunut iluaqutaanissaat siunertarineqarmat.

Annertunerusumik paasisaqarusunnermi naalackersuisup allattaa Manasse Berthelsen tlf.: 34 56 03/54 88 68-imut imaluunniit på e-mail: [pan@nanog.gl](mailto:pan@nanog.gl) aqqutigalugu attaveqarfigineqassaaq.

Assersuut: Sodavandi 1,5 literimik imalik (Faxe Kondi)

Poortuutissanut akitsuut UKA2023-imi 20 mio. koruunit nalinganut appartinneqarmat, Inatsisartuni partiinit amerlanerussuteqartunit tapersorsorneqarpoq.

	Danmark	Grønland
Poortuutitut akitsuut		kr. 2,90
Utertitsisarnerup aqunneqarnera		kr. 0,60
Sodavandinut akitsuut		kr. 11,25
Momsi	kr. 3,80	
Pisiniarfup pisiniarneranut, nassiussinermut iluanaarutissanullu akiusoq	kr. 15,20	kr. 35,25
<b>Utertitsinnginnermi akiusoq</b>	<b>kr. 19,00</b>	<b>kr. 50,00</b>